

Bunas relaziuns e pauc interess

Grischun: La stagiun da skis è bunamain a fin

DA GION NUTEGN STGIER / ANR

■ **En regiuns pli autas è anc adina enviern e las relaziuns per ir cun skis fissan bunas. Cunzunt en l'Engiadina han indigens è giasts anc occasiun dad ir cun skis e quai fin ils 25 da matg. Buns affars fan las pendicularas dentant strusch.** La stagiun da skis 2013/14 è tar nus bunamain istorgia. Quai conferma la retschertga che l'anr ha fatg tar las pendicularas grischunas. La gronda part da las pendicularas ha gia smess ses travagl glindesdi da Pasca, tiers las bunas relaziuns da naiv. Tranter auter è la stagiun ida a fin a Flem ed a Laax, nua che las pendicularas da l'Arena Alva han terminà avant trais dis la stagiun da skis. Quai è il cas er a Lai ed Arosa, las duas destinaziuns da skis che han collavurà communabel grazia a la colliaziun dals dus territoris da skis. Las relaziuns per ir cun skis fissan anc bunas, quai che manchia sajan ils skiunzs, ha ditg la pledadra da medias da las pendicularas. A Tavau e Clostra èsi be anc pusaisvel dad ir cun skis a la Parsenn e quai



Anc diesch dis è travagl tar las pendicularas da Samnaun.

anc fin dumengia proxima. Il territori da skis dal Jakobshorn è gia serrà er perquai che la pendiculara existenta vegn remplazzada cun ina nova.

Anc bunamain in mais

Er sche en l'Engiadina è stagiun morta han anc trais territoris travagl da skis. Al Corvatsch per exempel cuzza la stagiun da skis anc fin ils 4 da matg. Las relaziuns per ir cun skis sajan anc optimalas, e tuttina saja l'interess per ir cun skis pitschen. Engiadina Pendicularas SA ha confermà che a la Diavolezza saja anc travagl d'enviern fin ils 25 da matg. In di pli tard cumenza lura gia la stagiun da stad 2014. Anc diesch dis cuzza la stagiun per ir cun skis a Samnaun. *Niculin Meyer*, il responsabel da medias, ha ditg che en las regiuns pli autas saja anc blera naiv e las relaziuns fissan fitg bunas. Grev saja dentant da persvader persunas da la Bassa dad ir anc cun skis e cunzunt da carmalar quellas a Samnaun. A fin è la stagiun da skis 2013/14 a Samnaun ils 4 da matg.